

## II - ARABAKO LURRALDE HISTORIKOAREN TOKI ADMINISTRAZIOA

### ARRIETAKO ADMINISTRAZIO BATZARRA

#### Behin betiko onespena ematea urez hornitzearen tasa arautzen duen zerga ordenantzari

Kontzeju honek, 2018ko azaroaren 8ko bilkuran, hasierako onespena eman zion urez hornitzearen tasa arautzen duen zerga ordenantzaren espedienteari. Espediente hori jendaurrean egon den bitartean erreklamaziorik aurkeztu ez denez, behin betiko onetsita geratzen da.

Ondorioz, Toki Ogasunak arautzen dituen uztailaren 19ko 41/1989 Foru Arauaren 16. artikulua ezartzen dutenaren ildotik, testua oso-osorik ematen da argitara, indarrean sar dadin.

#### I. Xedapen orokorra

##### 1. artikulua

Arrietako Kontzejuak, Arabako Lurralde Historikoko Toki Ogasunak arautzen dituen Foru Arauan ezarritakoarekin bat etorritik, etxeak edateko urez hornitzearen eta saneamenduaren tasa ezartzen eta eskatzen du, ordenantza honen arabera. Ezarri beharreko tarifak jasotzen dituen eranskina ere ordenantzaren zati da. Ordenantzaren aplikazio eremua kontzejuaren mugarte osoa izango da, baldin eta sareekin lotuta badago.

#### II. Ordaintzera behartuta daudenak

##### 2. artikulua

Instalazioak eta zerbitzuak erabiltzen dituztenak daude ordaintzera behartuta. Edateko uraren banaketa sarera eta saneamendu sarera lotzeko eskubideen kasuan, etxebizitzetako hartuneak badira, hornidura sarearekin lotu behar den etxebizitzaren titularra egongo da ordaintzera behartuta. Harpidedunak eta administrazio batzarrak hornitze kontratua izenpetu eta harpidedunak kontagailua jarri aurretik ordainduko da ordaindu beharreko zenbatekoa. Gainerako hartuneak (askak, eta abar...), hartunearen eskatzaileak ordaindu beharko ditu.

#### III. Zerbitzua

##### 3. artikulua

Erabiltzaile edo harpidedunen eta toki administrazioaren arteko harremanak ekonomiko-administratiboak dira, edozein dela ere zerbitzuak erabiltzen duen kudeaketa sistema, eta zeinahi dela ere herritarren beharrak asetzeko erabiltzen dituen langileak eta instalazioak zerbitzura atxikitzeko era.

##### 4. artikulua

Administrazio batzarrak antolatuko du zerbitzua, eta publizitatea emango dio antolaketa horri; egiaztagutunak emango zaizkie zerbitzura atxikitako langileei, erabiltzaile guztiek ezagut ditzaten eta horren bermea izan dezaten.

Jabari publiko dira zerbitzuaren obrak eta instalazioak. Bestalde, zerbitzua egokia izan dadin, administrazio batzarrari dagokio inbertsio planen bidez ur emaria areagotzea, emari horren kalitatea hobetzea eta saneamendu sarearen eta arazketa sistemaren banaketa egokia egitea.

##### 5. artikulua

Zerbitzuak ez du izango irabazteko xederik, eta mantendu egin beharko da aurrekontuaren oreka, kontzejuak zerbitzuaren autofinantzaketa bermatzeko moduko tarifak onartuta.

**6. artikulua. Erabiltzaileak, zerbitzua erabiltzean, arau hauek bete beharko ditu**

1. Bere kontsumo eta premietarako baino ez erabiltzea ura, eta neurri gabeko kontsumoa, zarrastelkeria edo beharrik gabeko kontsumoak saihestea, hartara ahalik eta ur gehien egon dadin eskura, ur horniduraren erabiltzaile guztien hobe beharrez.

2. Administrazio batzarrari albait arinen jakinaraztea instalazio publikoan antzematen den matxura oro, batez ere matxurak isuria eragiten badu, edo edateko ura edo hondakin urak galtzea, edo saneamendu sareko hodiak itotzea. Norbere etxe barruko instalazioan gertatzen diren matxurak ere albait arinen konpontzen ahaleginduko da.

3. Ezingo du norberak aldatu edo ordezkatu kontagailua, ezta ere urez hornitu beste pertsona edo entitate batzuk, edo ura abonatuaren ustezko maizter edo errentarien artean banatu, eta polizaren baldintzak aldatu ere ez.

4. Administrazio batzarreko langileei eta, administrazio batzarrekoak izan ez arren, hark kreditatutako langileei erraztea eta ahalbidetzea haiek egin beharreko lanak; horretarako, polizan sartuta dagoen sare, instalazio, finka, etxebizitza, lokal edo eremura sartzen utziko zaie, hornidura eta saneamendu sistemak ikuskatzeko edo kontagailua irakurtzeko.

5. Administrazio batzarrak eskatutako datuak, zerbitzuei edo zerbitzu horiekin zerikusia duten alderdiei buruzkoak, ahalik eta zehatzen ematea.

6. Isurketak muga eta baldintza kualitatibo zein kuantitatiboen barruan egitea, hain zuzen ere, indarrean dagoen legediak eta Arrietako Administrazio Batzarrak onartzen dituen arauak ezarritakoen barruan.

7. Ezingo da isuri saneamendu saretik gai arriskutsurik, hondakin toxikorik edo araudi be-reziek araututakorik, edo, oro har, aplikagarri den legedi orokorrak xedatutako ezaugarri be-reziak betetzen ez dituen gairik edo ezaugarri ezinbestekoak betetzen ez dituen gairik, ez eta hiri hondakin edo antzekorik ere, nahiz eta alde zuzenetik birringailuetatik igaroarazitakoak izan.

8. Arreta areagotu egin behar da iturburuetatik hurbil dauden inguruetan, eta ezingo da isuri gairik kontsumorako ura uhertu, kutsatu edo pozoitu dezakeenik zuzenean edo iragazita, eta ezingo da egin ur hori uhertu dezakeen jarduerarik ere.

**IV. Harpidetza polizak****7. artikulua**

Edateko urez hornitzen duen zerbitzua edo hondakin uren saneamendu zerbitzua erabili nahi duen pertsona edo erakunde orok administrazio batzarrari eskatuko dio baimena, eta batzarrak instalazioek bete beharrekoak jakinaraziko dizkio. Eskaera egiten duena ez bada finkaren jabea, jabearen baimen idatzia aurkeztuko du.

**8. artikulua**

Erabiltzaileak harpidetza polizak sinatu arte ez da ez ur hornidurarik egingo, ez saneamendu hartunerik onartuko.

**9. artikulua**

Zerbitzuak harpidedunekin izenpetuko du beti hornitze kontratua, noiz ere instalazio horiek jarri behar diren finken jabeak edo edukitzaileak ez diren harpidedunak, baldin ezinbestekoak diren instalazioak bere kargura egiteko beharrezkoak diren baimenak lortzen baditu.

**10. artikulua**

Harpidetza polizek ez dute epe mugarik izango, baina erabiltzaileak, zerbitzua utzi nahi izanez gero, baja eman baino hilabete lehenago jakinarazi beharko du hornitze kontratua bukatutzat eman nahi duela.

Hornitze eta/edo saneamendu zerbitzuak kausa hauetako edozeinengatik azkenduko dira:

1. Harpidedunak berak formalki eskatzen badu etetea, eta hori egiaztatuko da administrazio batzarrean eskaera idatzia aurkeztuz, finkaren titularrak berak edo legez baimendutako pertsonaren batek sinatuta. Eteteak sortutako gastuak harpidedunak ordainduko ditu.
2. Kontratuak epe jakin baterako balioa izanik, epe hori bukatzen bada.
3. Polizaren titularrak jabetza edo erabilera eskubideak galtzen baditu zerbitzuak jasotzen dituen lokal, finka edo esparruaren gainean, edo hiltzen bada. Hala ere, harpidedunak, ez badauka zorrik administrazio batzarrarekin dituen betebeharrak ekonomikoetan, poliza eskualdatu ahal izango dio lokal bera erabiliko duen beste pertsona bati, kontratatutako baldintza beretan.

#### **11. artikulua**

Zerbitzuan baja eman eta gero hornidura berriro hasi nahi izanez gero, beste harpidetza poliza bat izenpetu beharko da.

### V. Hornidura

#### **12. artikulua**

Zerbitzuak harpidedunarekin batera ezarriko ditu kontagailuaren neurriak eta ezaugarriak, kontuan hartuta urez hornituko den higiezinaren, lokalaren edo eraikinaren baldintzak.

#### **13. artikulua**

Erabiltzaileak ezin izango du aldatu jasotzen duen uraren erabilera, ez badu aldezturik izenpetu beste helburu horretarako harpidetza poliza. Erabiltzaileak, era berean, ezingo du funtsezko aldaketarik egin instalazioaren ezaugarrietan, ez eta kontagailua bere kabuz aldatu edo ordezkatu ere; ezingo die, orobat, urik eman beste pertsona edo erakunde batzuei, ez eta hornidura banatu ere harpidedunaren ustezko maizter edo errentarien artean.

#### **14. artikulua**

Edateko uraren hornidura modu hauetan egin daiteke:

- 1.- Etxeko erabilerarako kontagailua, hau da, elikadurarako eta norberaren garbiketa eta higienarako.
- 2.- Industria erabilerarako kontagailuz:
  - a) Ura higieze garbiketarako bakarrik erabiltzen duten industria eta saltokiak.
  - b) Ura osagai edo lehengai gisa erabiltzen duten industriak (okindegiak, etxaldeak...); hots, fabrikazio prozesuan erabiltzen dutenak, hau da, fabrikazio prozesuan.

Aurreko ataletan sartzen ez diren erabileren kasuan, izan industriako erabilerarako, erabilera publikorako zein etxerako, zerbitzuak kasu bakoitzean proposatuko du, eman zaizkion datuen arabera, zein den ezarri beharreko ur emaria, eta emari horren arabera zehaztuko dira baldintzak eta tarifak.

#### **15. artikulua**

Zerbitzua ez dago behartuta nekazaritzarako ura ematera, ez eta lore, lorategi edo zuhaitz ustiapenentarako eta igerilekuentarako ere. Harpidetza poliza horiek bakar-bakarrik baimendu litezke zerbitzuak hornidura horietarako beharrezkoak diren ur emari handiak baditu; kasu horietan, industriarako tarifaren arabera kobratuko da kontsumoa.

#### **16. artikulua**

Harpidedunei ur hornidura etengabea eskainiko zaie. Ordenantza honetan xedatutako kasuetan baino ezingo zaio eten ur hornidura harpidedunari.

**17. artikulua**

Aurreko artikuluan ezarritakoari dagokionez, honako hauetan eten ahal izango da hornidura:

- 1.- Hornidura ezinezko egiten duen matxuraren bat gertatzen bada zerbitzuaren edozein instalaziotan.
- 2.- Ur emari erabilgarria galtzean edo gutxitzean, nolabaiteko gabezia sortzen bada ur horniduran, ur bilketan edo uraren presioan.
- 3.- Biztanleria handitzeak desoreka sortzen badu dauden horniduren eta kontsumo beharren artean, harik eta hornidura horiek handitu arte.
- 4.- Instalazioen hornidura hobetzeko beharrezkoak diren obrek, konponketek edo hobekuntzek irauten duten bitartean.

**18. artikulua**

Zerbitzuak, kasu bakoitzaren larritasunaren arabera eta kontuan hartuz eskura zer baliabide dituen, egoki irizten dion hedabide arin eta eraginkorraren bidez jakinaraziko die zerbitzuaren gorabeherak eragindako harpidedunei zerbitzua berehala etetera doala eta zer ordutan izango diren zerbitzu murrizketak. Larrialdi kasu garbietan edo ezinezkoa izan denean bakarrik utz dezake zerbitzuak bete gabe anomaliaren berri izan duen unean bertan ohartarazpena egiteko betebeharra; horrelakoetan, gerora egin beharko du, etenaren arrazoien eta ustez iraun lezakeen denboraren berri emanez, ahal izanez gero.

## VI. Hartuneak

**19. artikulua**

Hartunea da ura edo saneamendua eramaten duen adarra, hurbilen dagoen banaketa horditik hornitu nahi den higiezinera. Adar horren hobi eroalearen ezaugarriak izango dira hornitu beharreko ur bolumenaren eta/edo saneamenduaren arabekoak; ur hartune bakar batetik horniketa ugari egin daitezke finka berera.

**20. artikulua**

Adarraren edo hartunearen ezaugarriak, haren instalazioa, zainketa eta mantentze lanak erabiltzaileak kontratatuko ditu zerbitzuarekin, edo higiezinaren egileak edo finkaren jabeak, baina beti egingo da administrazio batzarraren aginpe teknikoaren menpean. Adarra edo hartunea zerbitzuaren ikuskatze teknikoaren menpean egongo da, eta eskatzailearen kontura izango da. Edateko ura banatzen duen sarerik edo saneamendurik ez dagoen eremuetan egiten badira eraikinak, eta obrak egiteko baimena administrazio batzarrak eman badu, sare berria eskatzailearen kontura izan dadila eska daiteke, baina zerbitzuaren ikuskatze teknikoaren menpe egin beharko da.

Aurrekoa kontuan izanik, edateko uraren hartune guztiek erregistro giltza bat izango dute bide publikoan, eta zerbitzuak bakarrik erabili ahal izango du, ezin izango baitute manipulatu ez harpidedunek, ez jabeek ezta hirugarren pertsonak ere. Higiezinaren fatxadetan edo kontagailuan jarriko da ixteko giltza, eta "irekita" edo "itxita" posizioetan zigitatuta egongo da. Debekatuta dago hori erabiltzea, instalazioen barruan matxuraren bat gertatzen denean salbu. Ixteko giltza hausten denean, berehala eman beharko zaio horren berri zerbitzuari; kontrakoa eginez gero, ordenantza honetan eta indarrean dauden xedapenetan ezarritako erantzukizuna eskatuko da.

**21. artikulua**

Oro har, adar edo hartune bat egongo da finka, eraikin edo higiezin bakoitzari zerbitzua emateko. Higiezinaren zati bateko maizter edo errentari batek hornidura berezi edo banakakoa nahi badu, eta horretarako arrazoirik badago, jar dezake hartune hori, baina administrazio batzarrak aldeko txostena eman ondoren.

**22. artikulua**

Jabeek, eraikitzaileek edo erabiltzaileek ixteko giltzatik abiatuta jarriko dituzte instalazioak, hau da, finkaren fatxadatik edo mugatik aurrera; horrela, ur ihesik egonez gero, ura nagusiki bide publikora isuriko da, eta ez ditu kaltetuko, ez higiezina, ez barnean dauden gauza edo instalazioak, eta, halakorik gertatuz gero, erantzukizuna haiena izango da soilik.

**23. artikulua**

Kontratua amaitutakoan edo deuseztatutakoan, adarra libre geratuko da jabearen esku; baina hark bost egunen buruan jakinarazi behar dio administrazio batzarrari, era frogagarrian, adarra bide publikotik kentzea erabaki duela, zeren, osterantzean, esan nahiko baitu adar hori ez zaiola interesatzen, eta administrazio batzarrak egoki deritzen neurriak hartu ahal izango ditu.

## VII. Kontagailuak

**24. artikulua**

Edateko ur horniduraren kontagailuak eraikin edo finka bakoitzaren kanpoko aldean jarriko dira, bat harpidedun bakoitzeko; guztiak ere toki egokian eta erraz iristeko lekuan. Horretarako, kontagailuak konpartimentu edo kutxa batean egongo dira, batera sisteman edo antzeko beste batean; horrela, zerbitzuko langile irakurleak erraz eta aldi bakar batean apuntatu ahal izango ditu kontagailu guztien zehaztasunak. Ixteko bi giltzaren artean jarriko dira kontagailuak, hartara, matxurarik gertatuz gero, zerbitzuko langileek erraz kendu eta berriro jarri ahal izan ditzaten. Kontagailutik abiatuta, hartunea zuzenean joango da harpidedunaren instalazioetara, inolako adarrik gabe. Erabat debekatuta dago kontagailu bera harpidedun batek baino gehiagok erabiltzea.

**25. artikulua**

Administrazio batzarrak ezarriko ditu harpidedunak erabili behar duen kontagailu mota, haren diametroa eta kokagunea. Kontagailu guztiek legez onartutako sistemetakoak izan behar dute, eta industriako lurralde ordezkartzak ofizialki egiaztatuko ditu jarri aurretik. "Jarri ondoren, eta nahiz eta erabiltzailearenak izan, zerbitzuko langileek bakarrik manipulatu ahal izango dituzte; horretarako, behar bezala zigilatuko dira jartzen diren bakoitzean."

**26. artikulua**

Kontagailua zaindu egin behar da, egoera onean egon dadin eta ondo funtziona dezan; administrazio batzarrak beharrezko jotzen dituen adina ikuskatze egin ditzake, bai eta egoki jotzen dituen konponketak ere, eta konponezina den matxuraren bat gertatuz gero, hura aldatzera behartu dezake erabiltzailea.

**27. artikulua**

Kontagailua harpidedunarena izango da, baina instalazioa administrazio batzarraren zuzendaritza teknikoaren menpean egingo da; matxuraren bat gertatuz gero, zerbitzuak baizik ez du izango eskuztatze eta konpontzeko eskumena, baina konponketa harpidedunaren kontura izango da.

**28. artikulua**

Iruzurra izango da edozein manipulazio, harpidedunak edo administrazio batzarraren baimenik ez duen pertsonaren batek kontagailuan, hartunean nahiz instalazioetan egina, ura kontagailutik pasa ez dadin edo egindako kontsumoa behar bezala jaso ez dezan.

## VIII. Barruko instalazioak

**29. artikulua**

Kontagailutik aurrera, harpidedunak nahi duen eran bana dezake ura bere erabilerarako, eta nahi duen eran egin horretarako lanak, zerbitzuak parte hartu gabe eskulanean eta beharrezkoak diren materialetan; hala ere, zerbitzuak instalazioa ontzat eman beharko du, hornidura erabat ondo egin dela bermatzeko, eta eskatzaileari laguntza eta aholkua eman diezaiotke hark eskatutako kontuetan.

Administrazio batzarraren ikuskatze teknikoaren menpe egongo da harpidedunaren barruko banaketa, edozein unetan egiaztatzeko zuzen dagoela, eta saihesteko kontratatutako horniduran gerta daitezkeen iruzurak eta gabeziak.

### 30. artikulua

Harpidetza poliza bakoitzari dagozkion barneko instalazioak ezin izango zaizkio lotu beste jatorri bateko ura banatzen duen sare edo hodi bati. Era berean, ezin izango zaizkio lotu beste harpidetza poliza batetik datorren instalazioari, ez eta Administrazio Batzarraren ura nahastu ere haren iritziz berme tekniko edo sanitariorik ez duen urarekin.

### 31. artikulua

Erabiltzaileak jar ditzake, barne banaketarako, andel hartzaile, erregulatuak edo erreserbakoak. Andel horiek txukun eta desinfektaturik mantendu behar dira, eta erabiltzaileak izango da horiek sor dezaketen kutsaduraren erantzule. Era berean, ura galtzea saihesteko behar diren sistema automatiko edo eskuzkoak edukiko dituzte, nahiz eta ur hori kontagailuak erregistratutakoa izan; hori dela-eta ardurarik gabe jokatzea zerbitzua oztopatzea dela joko da.

### 32. artikulua

Era berean, presio ekipoak edo bestelako artikulak teknikoak jar daitezke beren ezaugarrietatik hala komeni zaien higiezinetan, kontsumo aukerak orekatzeko hartune beretik ura hartzen duten harpidedunen artean edo barruko instalazio baten zati desberdinen artean.

Tresna horiek nahitaezkoak izango dira garaiera edo beste baldintza tekniko berezi batzuk direla-eta edateko uraren hornidura egokia bermatu ezin duten eraikinetan. Edozein prozedura tekniko erabiltzen dela ere, honako printzipio hau bermatu behar da nahitaez: edateko ura higiezinaren sarrerako hartunean kokatuta dagoen pasoko giltzatik igaro eta berehala pasatuko dela kontagailu guztietatik, iruzur egiteko edo zerbitzua oztopatzeko aukerarik egon gabe eta aplikazio horrek sare nagusiko beste ezein harpideduni eragin gabe.

## IX. Kontsumoa

### 33. artikulua

Harpidedunak edateko ura kontsumituko du harpidetza polizan ezartzen diren baldintzen arabera eta ordenantza honetan horniketaren ezaugarriei zehaztutakoaren arabera.

### 34. artikulua

Kontagailuak erregistratzen duena hartuko da benetako kontsumotzat; kontsumo hori arauzko minimoa baino txikiagoa denean, minimo hori hartuko da kontsumituztat, kontagailuak markatzen duena gorabehera.

### 35. artikulua

Kontagailuak matxuraren bat izan duelako edo ondo ez dabilelako ezin bada jakin zenbat ur kontsumitu den, adituko da aurreko urteko aldi bereko ordainagirian agertzen dena kontsumitu dela eta, horrelakorik ezean, azken hiru ordainagiri bategi bestekoa. Oro har, benetan kontsumitu dena zenbatesteko ahalegina egingo da, baina sistema hori salbuespenezkoa izango da, eta aldi baterakoa. Horrelakoetan, administrazio batzarrari dagokio kontagailua albat azkarren aldatzea, eta erabiltzaileari, antzeman dituen akatsak zerbitzuari lehenbailehen jakinaraztea.

### 36. artikulua

Erabiltzailearen bat ez badago ados kontagailuak erregistratzen duen kontsumoarekin, kontagailua aztertze eta egiaztatzeko eskatuko dio administrazio batzarrak industria ordezkariari; erregistratutakoa ondo badago, harpidedunak ordainduko ditu gastuak; txarto badago, berriz, zuzendu egingo da okerra.

**37. artikulua. Saneamendua**

Aurreko atalean xedatutako guztiak aplikatuko zaizkio saneamendu zerbitzuari, salbu eta duten izaera bereziarengatik beren-beregi hornitze zerbitzuari dagozkionak. Horiez gain, hurrengo artikuluetan zehazten direnak ere aplikatuko zaizkio.

Aurreko paragrafoan zehaztutakoetarako, ura dela-eta baliatzen diren "hornidura"; "banatze" eta "hornitze" hitzak, saneamendua dela-eta baliatzen diren beste hauen parekoak izango dira, hurrenez hurren: "huste"; "saneamendu" eta "isuri".

**38. artikulua**

Arrietako Administrazio Batzarra ez dago behartuta isuri kuota eskaintzera sarearena ez den sakoneran. Isuria beheragoko kotan egin behar bada eta kota hori kolektorea baino beherago badago, eskatzaileak ordaindu beharko ditu hondakin urak jasotzeko ezarri beharreko gailua jartzea, mantentzea eta haren kontsumoak.

**39. artikulua**

Administrazio batzarrak egokien deritzon lekuan lotuko zaio saneamendu hartunea saneamendu sareari, ahal dela lehendik dauden kutxatiletan. Saneamendu hartunearen diseinua eta eraikuntza estankoak izan beharko dira, batez ere saneamendu sareari lotzen zaion lekuari dagokionez.

Administrazio batzarrak eska dezake hartunearen hasieran eta sareari lotzen zaion lekuan kutxatilik jartzea, bai eta emarien kontrol eta kopururako kutxatilik egitea eta neurtzeko sistematik jartzea ere. Era berean, administrazio batzarrak eska dezake eraikinaren barruan hartune erregistrorako kutxatilik egiteko, berak zehaztutakoaren arabera. Dena dela, egitura aldetik irauteko moduan proiektatu eta egingo dira hartuneak, bai eta behar adinako babesarekin ere, bertatik igaroko diren uren agresibitate fisiko edo kimikoaren ezaugarriak aintzat hartuta. Hala ere, arazo teknikoak edo bestelakoak direla-eta, betiere administrazio batzarrak aurrez aldeko txostena eginda, ezin bada hartunea egin estolderiaren sare orokorrera, hobi septikoa jartzeko eskatuko zaio interesdunari, eta eskatzaileak ordainduko ditu beti hura egitea, mantentzea, garbitzea edo bestelako gastuak.

**40. artikulua**

Ur beltzetarako eta euri uretarako hartune bana jartzeko eskatuko du administrazio batzarrak. Horietatik ur beltzera baino ezin izango zaio lotu saneamendu sareari.

**X. Kobratzeko oinarriak****41. artikulua**

Kobratzeko oinarriak arautzeko, ur kontsumoa eta haren helburua hartuko dira kontuan, ordenantza honetako tarifen idazpuruetan ezarritakoarekin bat etorritz.

**XI. Tarifak****42. artikulua**

Harpidedun bakoitzak kontsumitutakoa administrazio batzarrak fakturatuko du, kontzejuak une bakoitzean onartutako tarifak zorrozki aplikatuz.

**43. artikulua**

Ur kontsumoa edozein dela ere, administrazio batzarrak tasa eta prezio hauek ere kobratuko dizkio harpidedunari: kontagailuaren zainketa, hartuneak egitea, instalazioak ikuskatzea, bide publikoan obrak egitea, lotura eskubideak eta kontzejuak "Tarifak" izeneko epigrafean baimendutako beste edozein.

**44. artikulua**

Eranskinean daude zehaztuta tasa horien tarifak.

**45. artikulua**

Horniduraren zenbatekoaren fakturazioa urtean behin egingo zaio harpidedunari.

**46. artikulua**

Aldeetako edozeinek eskritura publikoa egiteko eskatuz gero, harpidedunak ordainduko ditu gastuak (administrazio batzarrarentzako kopia kautoa barne), bai eta estatuaren, autonomia erkidegoaren, probintziaren edo udalerriaren aldeko edozein motatako zerga eta kontribuzioak ere, sortuak edo sortzeke daudenak, polizari dagozkionak zein, horren menpe egonik, eranskinetan eta oharretan agertzen den kontsumoari buruzkoak.

**47. artikulua**

Kontzejuaren hornidurako edateko ura edo saneamendu zerbitzua erabiltzean edozein hutsegite larri eginez gero, harpidetza poliza berehala hutsalduko da, eta ur hornidura eten; egintza horiek, gainera, toki ogasunari egindako iruzurra izan daitezke.

**48. artikulua**

Aurreko artikuluan xedatutakoaren ondorioetarako, arau-hauste larritzat joko dira egintza hauek:

1.- Hitzartutako ur horniduraz abusatzea, harpidedunaren ohiko jarduerarekin bat ez datozen ur emariak kontsumituz, justifikatutako kausarik gabe. Ez da justifikatutako kausa izango harpidedunaren instalazioetan matxura edo ur ihesa egotea, kontsumoa neurririk gabe handitzea eragiten duena.

2.- Erabilera txarren bidez horniduraren erregularatasuna oztopatzea, erabilera horiek beste erabiltzaile batzuen hornidura eragotz badezakete murrizketen edo hornidura mugatuen garaian.

3.- Urari hitzartutakoa ez beste erabileraren bat ematea.

4.- Zerbitzuaren baimenik gabe ura hirugarrenei ematea, dela dohainik, dela kostu bidez.

5.- Zerbitzuaren ura beste aprobetxamendu batzuetatik ateratzen denarekin nahastea, batez ere nahasketaren ondorioz kutsadura arriskua sortzen bada.

6.- Zerbitzuaren baimenik gabe zerbitzuko langileei ordaintzea, nahiz eta langile horiek harpidedunari egindako lanengatik izan.

7.- Langileei ez uztea sartzan harpidedunaren instalazioak, ur hartuneak edo kontagailuak dauden lekuetara, noiz ere zerbitzuari iruzur egin zaiola edo zerbitzua oztopatu dela susmatzeko arrazoirik baitago.

8.- Kontratuaren epea amaitu ondoren edo kontratua hutsaldu ondoren ura kontsumitzen jarraitzea.

9.- Justifikatutako arrazoirik gabe pasoko giltzak itxi edo irekitzea, zigilaturik egon edo ez.

10.- Instalazioak manipulatzeko, benetan kontsumitu den ur emaria kontagailuetan erregistratua izan ez dadin.

11.- Ez ordaindu nahi izatea, justifikatu gabe, kontsumitutako uraren zenbatekoa edo edateko uraren kontsumoarekin lotutako eskubideak eta tasak.

Justifikatu gabeko arrazoitzat jotzen da ordainketa hiru hilabete baino gehiago atzeratzea, nola eta ez dagoen erabakitzeke erreklamazio aski funtsatu bat, ordaindu beharreko diru zenbatekoari edo beste edozein gairi buruz.

12. Administrazio Batzarrak hala eskatu arren, ur kontagailurik ez jartzea.

13. Murrizketak daudenean ura erabiltzea nekazaritzan, lore ustiapenetan, lorezaintzan, zuhaitzietan edo igerilekuak betetzeko.

#### **49. artikulua**

Arau hauste arinak izango dira egiteak edo ez-egiteak, baldin eta ez badira aurreko artikuluan zehaztutakoak bezain larriak. Arau hauste arinak behin eta berriro egitea arau hauste larria izango da.

#### **50. artikulua**

“Administrazio batzarrak, hutsegite arinengatik, 750 euro arteko isuna jarri ahal izango du; larriengatik, 1500 euro artekoa; eta oso larriengatik, 3000 euro artekoa.”

#### **51. artikulua**

Iruzurra dakarten egitateengatik espedientea abiaraziko da, eta toki administrazioaren arloko xedapenen arabera izapidetuko da.

Delitutzat jotzen diren egintzak, hala nola zigiluak apurtzea, instalazioak suntsitzea, urak kutsatzea eta Zigor Kodean jasotzen diren gainerakoak, jurisdikzio arruntean salatuko dira, eta arau hauste oso larriak izango dira.

#### **52. artikulua**

Zordunak indarrean den legerian ezarritako premiamendu bidean sartuta geratzen dira.

Edateko uraren hornidura edo saneamendua ordaintzeari behin eta berriro uko egiten bazaio, aukeran izango da hornidura etetea, legeak horren gainean ezarritakoaren arabera.

#### **53. artikulua**

Harpidedunak baino ez du izango erantzukizuna neurriz gain kontsumitu izanagatik hirugarrenei sortutako kalteengatik.

### **XII. Xedapen gehigarriak**

Administrazio batzar honek, egokitzapen aldi bat igaro ostean, beretzat gordetzen du zerga ordenantza honetan aldaketak egiteko eskubidea, lege ezarritako prozedurak betez.

Hartunearen prezioa 2.430 euro izango da, eta kostu horri kontagailuak martxan jarri zirenetik lotune berria egin bitarteko KPlaren igoera erantsiko zaio.

Ezin izango da hartunerik egin, horrek zoladura berrian zangak egitea eskatzen badu, 10 urte igaro arte.

### **XIII. Xedapen iragankorrak**

Ordenantza hau indarrean sartzan denean sinatuta dauden kontratuak ofizios egokituko dira ordenantzaren ezarritakora, eta erabiltzaileak behartuta daude bertan zehazten diren arau guztiak betetzera. Hala ere, zerbitzuak errespetatu egingo ditu harpidedunek aurrez eta zuzenez eskuratutako eskubideak. Edonola ere, eskubide horiek iraungi egingo dira lehendik indarrean zegoen kontratua amaitzen denean.

### **XIV. Azken xedapena**

Ordenantza hau eta bere eranskina, zeintzuk 2018ko azaroaren 8an onetsi baitzituen behin betiko kontzejuak, ALHAOn osorik argitaratzen diren egunaren biharamunean jarriko dira indarrean, eta hala jarraituko dute harik eta aldatzea edo indargabetzea erabakitzen den arte.

### **Ordenantzaren eranskina**

Edateko uraren horniduraren tarifa:

Tarifa sei hilabeterik behin kobratuko da:

Mantentze eta lotune kuota euro bat izango da hilean; sei hilabeterik behin fakturatuko da, alegia, fakturazio aldiko 6 euro.

Etxeko erabilerak:

— Kontsumo kuota:

80 metro kubo edo gutxiago: 0,45 euro / metro kubo.

81-120 metro kubo: 0,65 euro / metro kubo.

120 metro kubo edo gehiago: 1 euro / metro kubo.

Arrieta, 2019ko otsailaren 5a

*Lehendakaria*

*AITOR ÁLVARO RUIZ DE EGUILAZ*